

Il tun fa la musica – era en la politica

Avertura armonica ed indulgenta da 50avla legislatura

■ (anr/vi) Igl è ina pitschna premiera. Quatter cussegliers naziunals da differents partidas han fatg musica ier a l'avertura da la 50avla legislatura. Els èn s'accordads bain ed han dà ina tempra persunala a l'act festiv. En il quartet cun duas violinas, ina viola ed in cello han sunà *Christa Markwalder* (pld), *Balthasar Glättli* (verd), *Maja Ingold* (pcd) e *Kathrin Bertschy* (pvl). Suenter la saramentaziun dals cussegliers naziunals è Markwalder vegnida elegida sco nova presidenta da la chombra gronda. Far musica e far politica dovrian las medemas abilitads, ha ditg la presidenta e musicista en ses pled. Ins stoppia tutgar il dretg tun e tadlar in sin l'auter per ch'i reusseschia.

Tun nuntipic ed indulgent

Sco president d'anzianità ha *Luigi Stamm* (pps/AG) avert la legislatura. Il tun da ses pled è stà indulgent e nuntipic per in politicher da la pps. El ha recapitulà tge ch'è capità entaifer ils 24 onns. Il 1991 saja el vegnì en il cussegl naziunal. Quai semeglia dad esser in lung temp, sco ina perpetnada, ha ditg Stamm. «Da l'autra vart sa regord jau sco sch'i fiss stà ier.» El ha engrazià a tuts cussegliers naziunals «tant da sanestra sco da la dretga» per la lavur ed ha perfin engrazià als esters che vivan en Svizra e tegnian cun il pajais.



Seramentaziun da las commembras e dals commembers dal cussegl naziunal.

KEYSTONE

Sco pli giuvna novelegida ha era *Lisa Mazzone* (verds/GE) pledà a l'avertura. Ses votum ha cuntegnì dapli color politica. Ils parlamentararis vegnian elegids

mintgmai per quatter onns, ma lur decisuns hajan consequenzas per pli ditg. La sortida da l'energia atomara haja per exempel in effect a lunga vista.

La dominanza virila

Era en sia 50avla legislatura resta il parlament vinavant ina bastiun dad umens. En las duas chombras sesan mo 71 dun-

nas: 64 en il cussegl naziunal e set en il cussegl dals chantuns. Dals 246 parlamentararis èn pia mo 28,9 pertschient dunnas. Il cussegl dals chantuns è clera-main la fortezza dad umens: Là è la cum-part da las dunnas crudà sin 15 pertschient. En la chombra gronda è ella creschida levet sin 32 pertschient. A proporziun han la ps ed ils verds cun circa 50 pertschient las pli bleras dunnas en lur fracziuns. La pps ha mo 15 pertschient e la pld 18 pertschient.

Ils tatga-tapun

Bunamain mintga sisavel dals 200 cussegliers naziunals politisescha gia dapi almain dudesch onns en la chombra gronda. *Luigi Stamm* (pps/AG) ed *Ulrich Giezendanner* (pps/AG) èn omadus vegnids elegids il 1991 en il parlament. Perquai che Stamm è pli vegl ha el già la quida da pledar sco president d'anzianità.

Anc pli ditg che Stamm e Giezendanner sesa *Maximilian Reimann* (pps/AG) en il parlament. Perquai ch'el è stà intgins onns en la chombra pitschna n'è el betg vegnì en roda sco president d'anzianità.

Mintga terz politicher cun passa dudesch onns en uffizi deriva da la pps. Ma er en la ps è mintga quart cusseglier naziunal in tatga-tapun. La pcd e pld mettan ina quarta dals politichers che isan passa dudesch onns las sutgas en il parlament.